

一切智光明仙人慈心因緣不食肉經

普門講堂印行

一切智光明仙人慈心因緣不食肉經

失譯人名今附秦錄

如是我聞；一時、佛住摩伽提國寂滅道場、彌
加女村、自在天祠精舍。時有迦波利婆羅門子、
名彌勒，軀體金色，三十二相、八十種好，放
銀光明，黃金校飾，如白銀山，威光無量。來至
佛所。爾時、世尊與千二百五十比丘經行林中，
又有結髮梵志五百人等，遙見彌勒威儀庠序，

相好清淨，五體投地，如銀山崩，成金花聚，衆寶
間廁，金華金臺，七寶爲果；於臺閣中，有妙音聲
而說偈言：

我見牟尼尊	面貌常清淨	百福相竒特
世間無倫匹	煩惱垢永盡	智慧悉成滿
一向常歸命	身心無疲倦	故我以五體
欲得勝安樂	脫苦無所畏	敬禮釋迦文

時諸梵志見聞此事，白佛言：「世尊！如此童子，

威儀庠序，光明無量，與佛無異。於何佛所初發道心？受持誰經？唯願世尊爲我解說！

佛告式乾梵志：「汝今諦聽，善思念之，吾當爲汝分別解說，令汝歡喜。乃往過去無量無邊阿僧祇劫，時有世界，名勝華敷，佛號彌勒。恒以慈心、四無量法，教化一切。彼佛說經，名慈三昧光大悲海雲，若有聞者，即得超越百億萬劫生死之罪。必得成佛，無有疑慮。時彼國中有大婆羅門，名一切智光明，聰慧多智，廣博衆經，世間技藝，六十

四能，無不綜練。聞佛出世，說慈三昧光大悲海雲經，即以世間一切議論，難詰彼佛，盡其辭辯而不能屈，即便信伏，為佛弟子，尋發阿耨多羅三藐三菩提心，而作是言：我今於佛法中，誦持大慈三昧光大悲海雲經，以此功德，願於未來過算數劫，必得成佛，而號彌勒。於是捨家，即入深山，長髮為相，修行梵行，八千歲中少欲無事，乞食自活，誦持是經，一心除亂。彼時世間有雨星現，國王淫荒，彗星橫流，連雨不止，洪水暴漲！

仙人端坐，不得乞食，經歷七日。時彼林中，有五
百白兔，有一兔王，母子二獸，見於仙人七日不食
，而作是言：「今此仙人爲佛道故，不食多日，命不
云遠，法幢將崩，法海將竭，我今當爲無上大法，
令得久住，不惜身命！」即告諸兔：「一切諸行，皆悉
無常，衆生愛身，空生空死，未曾爲法。我今欲爲
一切衆生作大橋梁，令法久住，供養法師。」
爾時兔王即爲羣兔而說偈言：

若有畜生類 得聞諸佛名
永離三惡道

不生八難處

若聞法奉行

生處常值佛

信法無疑惑

歸依賢聖僧

隨順諸戒行

如是疾得佛

必至大涅槃

常受無上樂

爾時兔王說此偈已，告諸兔言：「我今以身，欲供養法，汝等宜當各各隨喜。所以者何？我從多劫，喪身無數，三毒所使，為鳥獸形，唐生唐死，未曾為法。吾今欲為無上法故，棄捨身命，供養法師。」

時山樹神，即積香薪，以火然之。兔王母子圍遶仙人，足滿七布，白言：「大師！我今為法，供養尊者！」

仙人告言：「汝是畜生，雖有慈心，何緣能辦？」兔白仙人：「我自以身供養仁者，為法久住，令諸眾生成得饒益故。」作此語已，即語其子：「汝可隨意求覓水草，繫心思惟，正念三寶。」爾時兔子聞母所說，跪白母言：「如尊所說，無上大法，欲供養者，我亦願樂。」作此語已，自投火中！母隨後入！當於菩薩捨身之時，天地大動！乃至色界及以諸天，皆雨天花持用供養。肉熟之後，時山樹神白仙人言：「兔王母子為供養故，投身火中。今肉已熟，汝可食。」

之。L時彼仙人聞樹神語，悲不能言，以所誦經書
置樹葉。又說偈言：

寧當然身破眼目 不忍行殺食衆生

諸佛所說慈悲經 彼經中說行慈者

寧破骨髓出頭腦 不忍噉肉食衆生

如佛所說食肉者 此人行慈不滿足

當受多病短命身 迷沒生死不成佛

時彼仙人說此偈已，因發誓言：願我世世不起殺想，
恒不噉肉；入白光明慈三昧；乃至成佛，制斷肉戒。L

作此語已，自投火坑，與兔併命！是時天地六種震動，天神力故，樹放光明，金色晃耀，照千國土。時彼國中諸人民等，見金色光從山樹出，尋光來至，既見仙人及以二兔死在火中，見所說偈，并得佛經，持還上王。王聞此法，傳告共宣，令聞此者，皆發無上正真道心。

佛告式乾：汝今當知，爾時白兔王者，今現我身釋迦牟尼佛是。時兔兒者，今羅睺羅是。時誦經仙人者，今此衆中，婆羅門子彌勒菩薩摩訶薩是。我涅槃後，

五十六億萬歲，當於攘佉轉輪聖王國界，華林園中，
金剛座處，龍華菩提樹下，得成佛道，轉妙法輪。
時五百羣兔者，今摩訶迦葉等五百比丘是。時二百
五十山樹神者，舍利弗，目捷連等二百五十比丘是。
時千國王，跋陀婆羅等千菩薩是。彼王國土諸人民等
得聞經者，從我出世乃至樓至，於其中間受法弟子，
得道者是。

佛告式乾：「菩薩求法，勤苦歷劫，不惜身命，雖復從
報受畜生身，常能爲法不惜軀命，投於火坑，以身

供養，便得超越九百萬億劫生死之罪；於是得在恒
河沙等無量諸佛先，亦先彌勒前得成佛道。汝等云
何不勤爲法？佛說是語時，式乾等五百梵志，求佛
出家。佛言：「善來！」鬚髮自落，即成沙門。佛爲說法
，豁然意解，成阿羅漢。八萬諸天，亦發阿耨多羅三
藐三菩提心。時會大衆聞佛所說，各各稱讚菩薩所
行。舍利弗白佛言：「時彼仙人投火坑已，爲生何處
？」佛告舍利弗：「時彼仙人投火坑已，生於梵世，普爲
一切說大梵法；乃至成佛，轉大梵輪。所說經典，亦

名慈三昧光大悲海雲；所制波羅提木叉，不行慈者，名犯禁人；其食肉者，犯於重禁；後身生處，常飲熱銅。至彼仙人得作佛時，如彌勒菩薩下生經說。

尊者阿難聞佛所說，即從座起，偏袒右肩，右膝著地，合掌向佛，又手長跪而白佛言：「世尊！彌勒成佛所說戒法，乃以慈心，制不食肉爲犯重禁，甚奇！甚特！時會大衆異口同音，皆共稱讚彼國衆生不食

肉戒，願生彼國。世尊悉記當得往生。尊者阿難復白佛言：「當何名此經？云何受持之？」佛告阿難：「

此法之要，名白兔王菩薩不惜身命，爲無上道；
亦名一切智光明仙人慈心因緣不食肉經。如是受持。
尊者阿難，及諸比丘，聞佛所說，歡喜奉行！

一切智光明仙人慈心因緣不食肉經

附錄

四分律行事鈔

諸律並明魚肉爲時食。此是廢前教。涅槃云。從今日後。不聽弟子食肉。觀察如子肉想。夫食肉者。斷大慈種。水陸空行有命者怨。故不令食。廣如彼說。

楞伽云。有無量因緣。不應食肉。略說十種。一者一切眾生無始已來。常爲六親。以親想故。不應食肉。二狐狗人馬。屠者雜賣故。三不淨氣分所生長故。四眾生聞氣。悉生怖故。五令修行者慈心不生故。六凡愚所習。臭穢不淨。無善名稱故。七令呪術不成就故。八以

食肉見形起識。以染味著故。九諸天所棄。多惡夢。虎
狼聞香故。十由食種種肉。遂噉人肉故。如斑足王經
說。

今有凡愚多嗜諸肉。罪中之大。勿過於此。故屠者販
賣。但爲食肉之人。必無食者。亦不屠殺。故知食者同
屠。造業沾殺生分。可不誠乎。

食肉戒第三 (林凡綱經)

若佛子。故食肉。一切肉不得食。斷大慈悲性種子。一
切眾生見而捨去。是故一切菩薩不得食一切眾生
肉。食肉得無量罪。若故食者。犯輕垢罪。